

CHINESE - JAPANESE LIBRARY OF  
HARVARD - YENCHING INSTITUTE  
AT HARVARD UNIVERSITY  
MAY 7 1940

T 3200/0823.83

22



廣德州志卷三十六

哈佛大學漢和圖書館珍藏印

人物志

義行

隱逸

寓賢

方技

仙釋

義行

睦嫻任卹重於周官昔人指困分金所以風高千古也桐郡風氣淳樸修士立名匹夫慕義亦足以敦古處而振頽風有美必揚載筆者之責也爰於舊登者仍之續採者增之

宋

王機字仲達建平人其先宛陵人建炎兵訐徙家建平仗

義好施賑卹宗族歷官修武郎嘉定八年歲饑部使者  
真德秀貽帖易粟機慨然應之通志溪南地洿沈竈機載  
粟往哺民全活甚衆以其尙濮王嗣永康縣主稱爲王

駙馬云楊志

明

步祖一富而好義當塗采石山有英烈廟宋建以祀虞忠  
肅公允文者歲久頽敝成化辛卯知太平府施奇欲改  
爲未果祖一聞之以銀百兩往助遂構材興工廟貌一

新見彭時修廟記據南畿志增

東郭老人家貧業賤僻居窮巷體無完衣晨起汲水見道  
傍遺囊拾歸俄聞有徽商譁訟索於逆旅老人曰子遺  
囊於道余得之彼何咎挈而授之約二百餘兩封識宛  
然商德之酬以半老人曰余無銀猶故我也汝無銀將  
無歸且余旣不欲得何以半爲或曰老人名君附王其

姓也楊志

步顯四三十一都義民出銀五百兩建明倫堂萬曆志性好

施歲歉代完逋稅賑濟貧民嘉靖十四年知州朱麟獎  
曰常賠一州之稅屢賑饑荒之民贈匾曰先義貸賦季志

趙杰三十七都義民頗好文墨居喪不入私室

萬曆志

案萬曆志載義民止步趙二人楊門志皆逸之今並

列於此

許異凡庠生郡每歲徵糧南北兌運例於櫃里僉點漕額

深為民病異凡赴院痛陳弊害數年不得歸家資幾盡

兩院疏請得免勒碑州治前至今賴之

季志

龔某

舊志失載名字

捐地十三畝零為儒學基址有舊碑在學宮

其先世本明初宦家事載州人盛於德舊志評本

季志

駱憲德號清溪嘉靖庚戌江南大饑詔募民出粟助賑憲

德應詔創捐鄉閭獲濟州守莊以聞賜冠帶

據駱氏譜增

張大化字汝誠幼聘管世儒女既而女以痘瞽世儒請張

別議婚父母將許之大化甫十歲持不可曰瞽在聘後

是兒命也况瞽女既退誰復娶之耶父母聽其言及成

婚伉儷甚篤數十年愛敬不衰隆慶辛未知州鍾表其

義

據張氏譜增

姚啓宗字午明建平人庠生母病不解衣者浹二旬篤學

好義見人冤抑不惜破產申雪之有誣陷大辟者啓宗

仇也啓宗力為解釋有姚聞四者負啓宗五十金欲鬻

妻以償啓宗亟焚其券生平著述亦多

通志楊志

王應篤字時敏建平人家貧好義里人有貸金娶妻者生

子十歲矣不能償欲鬻子償之應篤焚券不復索歲饑

出穀二百石以賑鄉人

通志

許煉任樂平縣尉嘗拾金還人捐產膳弟

萬歷選舉志

黃時濟徽州歙縣人商於建平見衢路泥濘行旅苦之萬

歷丁丑鳩工伐石北自樸樹巷抵竹墩灣南自鎮山麓

抵港橋園延袤數百丈發砌平密費不下數千緡中建

二亭召僧居之捨田收息以備茶薪俾勞者息渴者飲

焉邑民有鬻妻償債者捐貲全之野死者給槥邑令劉

萃義之爲作永惠亭記勒石

縣志

沈通字子達誠樸人也萬歷庚辰歲惡出廩粟減價以糶

爲粥飼餓者郡多盜臺使倣周官鄉士遂士法鄉署一

人使督捕衆推通旣受事盜相戒不入所部

據沈氏譜增

沈應洲字斗南磊落有智畧明季賦重應洲自鄉遷城挾

貲服賈山左崇禎戊辰州判某運顏料銀赴京途遇盜

畱滯濟寧應洲卽傾囊中四百餘金贈之後應洲回里

州判具酒勞之西門外濯纓橋且酬以子母應洲堅却

之友盧某貸多金焚其券其尚義類是

據沈氏譜增

史大典字惇甫建平人父志尹早卒事節母宗六十年以

孝聞性澹仕進邑有義舉每為倡率崇禎十年捐三千

金重建學宮又置學田五十畝咨部議給其子習孔補

博士弟子員兩與鄉飲乾隆十七年邑令貢祠祀之

據縣

申稿增

國朝

周本蘭建平人居家孝友明末歲歉本蘭出五百石助

賑里有不能輸賦者代之縣令栢肯堂申院旌獎

李志

夏璿暘字睿甫建平人性好周濟順治八年旱輸穀五

百石全活者眾學博蕭松齡以優行詳請給獎璿暘力

辭不受著有繼眉詩文行世

李志縣志

程應桂建平人為邑掾乙酉兵亂知縣杜鶴年家口百

餘應桂多方匿之獲全初鶴年知事不可為攜孤孫付

應桂曰事勢至此吾必不免茲以一塊肉託子應桂許

諾後鶴年被殺護其孫與主婦還關中邑令張正中顏

其居曰義高千古

通志縣志

李邇泰貢生事繼母盡孝鄉賢祠圮獨力建造有貧不

能婚嫁者邇泰代為完娶凡五姓戊子歲稔設厰施粥全活甚衆死者施棺湖峴山多暴骨歲捐貲收埋之好善樂施四十年無間李志

濮陽遇皆字君煥家庭雍睦非公不謁有司時嚴容匿逃匪之法株連甚衆遇皆備陳其狀於制府卽公公躉之為寬其坐族有鬻妻償官帑者遇皆為代償之全其夫婦顰免地畝羨征歲歉出粟賑饑康熙十二年舉優匾獎之曰人倫之表李志

趙先簡字公從剛直廉介凡請建學宮及有益地方之興作先簡輒先為之不避勞苦康熙甲辰舉優李志王邦字煒先由貢生選鴻臚寺主簿逢歲稔捐穀至數千石又施棺木修義塚牆垣樂善好施至老不倦督撫三加旌焉卒年八十三李志

濮陽緒字緒人貢生性醇厚好施已債貧佃負租不取者先後計數千石凡興作有利地方者贊襄當事竭貲任勞無倦意康熙六十一年歲稔緒出穀賑饑多所全濟雍正二年例許郡邑人文較盛者廣入學額數衆皆觀望緒毅然倡之道路往來之費盡出一人得增廣五



名人才奮興緒有力焉李志

烏方新字文若建平人庠生與伯氏同居五十年無間

生平謹言行審取與有遺橐於園側者書榜召其人還

之曾與鄉飲人以古君子稱之李志

王之詔字嘉諭建平人好義樂施親族不舉火者指困

贈之年饑減穀價貰貸不吝里有訟一言輒釋有王彥

方之風李志

宗瑛字鼎光建平人貢生父早逝諸季皆幼撫之成立

柝產織粟不私置田宅以供祠祭惠族衆兩遇歲歉出

米千六百石有奇爲粥以食餓者他如文廟義學義倉

浮橋渡口圩堤皆悉心經理置產以供歲修李志

方珍建平人年二十五失偶一子一女呱呱待哺人勸

之續娶珍曰吉甫放伯奇仲舒放符起豈未聞與終身

不再娶年八十六卒李志

周明徵字聖謨歲儉出米以賑州守高額曰施濟有功

學宮將圯堪輿家謂巽方秀氣不聚與丁龍風火不相

濟守欲因修學并創建三台閣於其左慎擇董事者衆

推明徵不數月告成繼葺州廳事半載亦竣守甚重之

後署守謝洪舉鄉飲復以恩隆憲乞獎之

周氏譜

張家麟字兆聖篤於孝友好施不倦里有沈某將賣妻

償逋議既定夫婦相持慟哭家麟聞之往讓其媒立贈

以金事遂寢有黃姓將鬻子家麟遺之金并常賙其乏

子得成人學正許南宮為立傳

張氏譜

沈龍紱字復初庠生例貢乾隆辛未郡饑龍紱與弟庠

生燾鬻產賑粥丙子又饑兄弟復捐賑之自春初訖麥

秋約費千金州守帥嘉其義行上之撫軍高給額曰惠

周里黨丙子之賑高元桐亦鬻田以佐適有楊某將賣

妻償責元桐聞之即以直代償夫婦獲全

公舉下同

沈霖國學生慷慨好義乾隆丙子歲饑霖捐米二十四

石乙巳旱災又捐六十石州守穆給額獎之又出錢三

十千助修文廟子炳庠生

王來儀字鳳威好善樂施乾隆丁亥歲稔來儀捐米二

十五石助賑復多方勸募以資接濟州守張以功同袁

佐獎之

沈綱字惇三衡之子國學生喜讀書慷慨好義乾隆壬

申己丑乙巳連遇饑疫倡捐賑米施棺城南潘老一子

痘危貧不能治綱資以醫藥東城方老死妻窘於債將  
鬻養媳以償綱立與三十金止其事方所居舊鬻於綱  
并焚其券郡倅左額曰積善餘慶正誼書院苦湫隘綱  
請於前守石卽明舊學基別建卽今復初書院也工鉅  
費繁值歲祲綱常以己資濟之比落成以焦勞成疾卒  
史郁建平人太學生孝事孀母年二十四喪耦遂不復  
娶性行端慤訓後有方乾隆三十七年年八十五以義  
夫詳請學使朱獎曰烏鼓鶴琴踰年卒

縣

附

陳益先弟樹澄俱監生其父嘗諭之曰州人罕儲蓄遇  
荒則運糴維艱米輒騰貴汝等餘貲但多市穀凶年可  
平價出糶兼濟闔里之貧乏者故其家積穀頗豐乾隆  
乙未郡旱災益先兄弟捐米百四十餘石煮賑兩月薪  
工錢幾百千州守趙勒姓名于旌善亭乙巳又大饑益  
先樹澄捐米三百五十石直千餘金錢五十千凡捐賑  
在三百兩以上例得議敘乾隆五十七年州守胡遵憲  
開報履歷詳請核奏此外乙未捐米以石計者雲克凝  
戈以寧范文邃各二十五步居易二十高瀨十七裘元

宰邱岳呂音各十二許占榮十一沈綱錢壽濮陽緒趙  
文炎裘一新張宗昉王廷和王得會王士恒沈蔡及典  
舖各十皆列名旌善亭時有王元明者僅有田五畝悉  
鬻以助賑人尤難之州守趙州判左獎以額曰義切鄉  
閭好善可風盧元傑亦出米以助乙巳捐賑則戈于上  
出米七十石元傑又捐賑月餘州守穆贈以惠盈里閭  
匾

王以寧字馨伯監生乾隆丙戌疫作倡施棺丙申饑倡  
捐煮賑州判左獎以樂善不倦善琴曉音律學正朱延  
教僉生焉

張覲字方伯監生善事後母致敬寡嫂乾隆辛丑捐建  
復初書院百金并助修 文廟先是丙申歲稔賑濟一  
月州守楊獎曰德溢鄉閭西鄉金剛嶺險峭砌以石所  
費二百餘兩行旅便之又建石橋於百畝坪之溪

李可升建平人捐布政司經歷銜乾隆乙巳歲饑捐銀  
三百六十兩助賑又廩生王以智捐銀三百二十兩五  
十七年州守胡奉藩司行查遵例開報詳請議敘

王兆鵬建平人監生自幼孝事繼母既壯父病瘵繼母

又癡侍奉九載無頃刻離又性好施乾隆乙巳饑出米倡族捐賑邑令畢以孝友仁慈匾獎之

隱逸

視軒裳如草芥屏嗜慾若泥沙斯其人視逐逐紅塵者遠矣桐之以隱逸著者宋以來間有之李志列之列女後謬也

宋

張介紹聖時人隱居城北不干榮進郡守孫諤慕其名禮之每訪以政要酌唱終日以詩贈之有竹林歲月讀書家之句嘗欲疏其學行薦於朝介固辭不就

楊志

趙平叔咸淳中人隱居城西琴山側樂松竹泉石之勝吟

咏自適構一樓以縱眺望殿院章重之題曰萬山樓庚子郡大饑發粟助賑全活者衆人稱爲潛德君子楊志

元

湯子真家貧力學隱居求志行式鄉間學型士子錢尙書

用壬出其門當時以爲用壬之學皆其師造就之功楊志

盧志賢至元中隱居林下不干仕進清修峻節當時稱重

楊志

明

甯時字際之號愚谷郎中珂曾孫也性磊落不羈作詩文

口占令人書之不加點竄悉抒妙蘊從學宣城沈耕巖

沈曰甯子始而博其學無所弗函旣而抑其才一求諸

道因貽書楊維斗欲薦諸朝不就隱於羲蒼山中從遊

者甚衆著有尙書說洪範解論語口授講義屈辭疏指

季志

張榜字子賢至性孝友食必思親喪必依靈尺帛不以自

私歷膺臺獎隱居青石山賦詩以終餘年楊志

呂仲修字徂生建平人爲諸生以醇謹稱崇禎庚辰廷試

特賜進士授四川樂安知縣道梗謝官歸悠悠田間甘

茹淡薄未嘗以一刺謁公庭士論重之楊志

國朝

戈琮字耦蒼黜華敦實嗜讀書澹於進取援例入太學  
五十後足跡不入城市姻黨見者輒問學業奚似交遊  
何人當意則喜或畱款竟日否則默然由是人咸敬憚  
之子溱以名諸生充貢琮之教也琮年七十二卒著有

見山樓詩集

公舉

寓賢

名賢游歷所經山川借以增色後世傳為美談蓋以  
其人之德業聲望卓著千秋稽古者重其人兼重其  
地焉郡多佳山水唐宋來高士名流每於此僑寓因  
卽舊志所登訂訛補漏用資考信焉

唐

張志和本名龜齡浙江金華人由明經擢第獻策肅宗深  
蒙賞重令翰林待詔授左金吾衛錄事參軍改名志和  
字子同尋貶南海尉不願之任遂扁舟垂綸自謂烟波

釣徒又號元真子大厯九年秋訊顏真卿於湖州真卿以舴艋既敝請命更之答曰倘惠漁舟願以為浮家泛

宅沿沂江湖之上往來茗雪之間野夫之幸矣

顏真卿撰元真

子嘗寓於州北二十五里築臺溪水之旁釣以適志意

不在魚後人重之因名其地為釣臺

萬厯志

〔案〕萬厯志此下有郭師從乃吳越將破廣德者不可

言寓今移入兵寇

宋

王謙宛陵人建炎間避兵徙建平高蹈不仕子浩亦有隱

德浩子機官修武郎繼娶濮安王第四女永壽縣主機

子元龍壽佺元剛元袞並肄進士業一門孝友及尙主

士論艷之

萬厯志

〔案〕建平寓賢萬厯志列伍員王謙二人縣志以伍非

流寓因與王俱附名宦後不另為卷至王機子元龍

等四人楊門及縣志俱云並登進士而選舉志無之

惟王廷袞開禧進士疑廷為元之訛而其傳又並不

云是機子詳核萬厯志原文乃言元龍等並肄進士

業也其始妄為刪竄其繼相沿訛陋遂至自相矛盾



而不顧可歎也

潘承字子輔大名人韓國武惠公美之元孫元符進士除館職為時宰所忌引退建炎初起為大理評事扈蹕南渡居杭州紹興四年避兵建平遂終老焉從子良貴紹熙時中書舍人亦寓居建平後徙婺州

據縣申稿增

盛瑞字晉祥宣和間進士紹興中愛不老泉之勝卜居焉

通志

案萬厯志失載盛瑞而有王十朋謝深甫皆道經廣德南宋建都臨安道出獨松苦嶺者不一而足烏得

為僑寓今刪

景明襄陽人由孝廉任浙江明州教授訓士有方紹定時擢知江陵縣挈眷赴任道經建平素善吳應龍過訪之會父沒旅舍遂葬於邑之東郊終身守墓今景史村其

故居也

據縣申稿增

趙時晦寓居廣德死元兵之難

通志

明

倪原字本立號竹簡翁湖廣人洪武初任廣德判後寓居

南碕湖東善吟咏有詩稿傳世

萬厯志

錢德洪名寬字德洪後以字行改字洪甫餘姚人學於王守仁時四方士踵至德洪與王畿先為疏通大旨而後卒業於守仁嘉靖七年偕畿赴廷試聞守仁訃至貴溪終心喪後成進士累官刑部郎中尋被廢周遊四方講良知學為人所宗穆宗朝復官進階朝列大夫學者稱緒山先生

明史本傳 德洪遊學廣德寓復初書院

楊志 王畿字汝中山陰人弱冠舉于鄉跌宕自喜與錢德洪同學於王守仁後同第進士累官兵部郎中尋被廢益務講學足跡徧東南善談說能動人所至聽者雲集學者

稱龍谿先生

明史本傳 畿來會復初書院與鄒東廓講顏子不遷怒不貳過曰心常定故不遷心常一故不貳以醒

後學

楊志

王艮字汝止初名銀泰州人學于王守仁守仁為更名早年讀書止孝經論語大學信口談說中理解及從守仁門弟子率多爵位艮以布衣抗其間聲名反出諸弟子上門徒之盛與王畿相埒學者稱心齋先生陽明學派以龍谿心齋為得其宗

明史王畿傳 艮言笑不苟篤信好學來從東廓游講學復初書院

楊志

沈寵案舊志字畏思案龍谿集號古林宣城人學貫經史

來從鄒東廓王畿錢德洪游講明理學領嘉靖鄉薦仕

至廣西布政司參議著有古林摘稿子懋學萬曆間官

修撰從孫壽民字眉生為諸生有聲崇禎九年保舉入

都疏劾兵部尚書楊嗣昌嘗作桐溪會引參明史楊志寧國府志

戚袞字補之號竹坡先世祥符人南渡家宣城補郡庠生

遂精于易鄒東廓判廣德時袞從之遊嘉靖間以選貢

任項城知縣政成以疾致仕嘗著動靜知行中和臆說

於師說多所發明王畿為誌墓據龍谿集增

案州署禮科有舊存祀冊內載前明復初書院為鄒

文莊講學所當時從學者有南京國子司業周友之

順天府通州判官施之修南京戶部郎中濮致昭高

郵訓導張子卿以上四人惟周友之無考餘詳傳及選舉志涇邑廩生張

士儀本郡李性甫鄭國忠張子賢儒學每歲春秋丁

日致祭文莊以諸賢附祀今二丁專祭文莊諸賢附

祀久廢特附於此以俟博考

王豫字介夫浙江烏程人萬曆丁丑進士官至福建按察

司僉事免歸講學桐川著周易翼一書方演艮卦而逝

據經義  
考增

方技

曲學小道致遠者所弗爲然其濟世利物效亦可觀  
桐之精藝事者僅矣舊志遂闕今畧採姓名補之

宋

洪德風精天文家州有汪九成者庚寅生於隆興二年上  
元甲申歲正月作坤申方犯太歲月破月入中順行壬  
申金加臨其方尅庚刑寅金冲木命當月暴病至夏漸  
重八月人道轉到坤申遇德風修報此方以本命主日  
主命宮主曜氣中避仇難趨恩福用神內調赦解到方

位秋分中局一宮甲子逆遁甲申八艮庚寅二坤以艮  
 加坤乾六山地剝六二己巳官五坤六四丙戌父在乾  
 六五丙子子在兌上九丙寅才到艮順遁乙奇在坤以  
 艮加坤八白生門在坤申歲入中順遁本命祿馬甲申  
 陽貴戊寅食祿辛亥俱在坤月入中順遁本命陰貴壬  
 午五坤得令當權癸酉月選辛未開日生氣在坤選庚  
 寅時比助身強月德五坤辛未日以庚寅為陽貴合時  
 上貴人格修後病除無恙

魏青江宅譜三  
書修方却病門

國朝

巫山字雲岫號景崖庠生治岐黃家言以郡無名師走  
 謁西昌喻嘉言先生自是術益精家故饒藥籠每攜參  
 連等藥救人不求償也州守李疾羣醫束手山投二劑  
 立瘥人問其故答曰無他北人用北藥耳視脉決壽夭  
 多中人皆神之三子皆遊庠亦知醫

巫氏  
譜

潘仍桂字我生建平人武庠生能詩善畫蘭康熙壬寅  
 以無妄逮繫廉使獄日以畫蘭自娛獄卒售之頗得利  
 畫由此益精越二年得釋歸酒酣興至始一下筆索者  
 盈門其妾亦善畫然不及仍桂之蒼老也

縣  
申

洪遠侯精幼科活人甚衆州守李周先後贈額曰理精保赤功同慈乳李守國相又以杏林宣績獎之公舉

沈之驥字台存初習舉業後習醫亦精幼科得洪氏秘傳丸丹療治如神之驥子諒爲懷垂簾一肆遠近就視者盈門毫不計值壽七十八終子廷銓字金源繼父業謹愿如其父事親以孝稱鄉里有疑難廷銓排解之衆皆折服乾隆甲辰鄉飲介賓現年七十三公舉

仙釋

二氏語涉虛無故先儒闢之而史傳猶列之者以其悟入希夷道參元妙亦自有深造自得之一境耳因取舊志所載加之考補至王婆并投丹化醴之類移載別門

漢

張真君諱渤句容人嘗學道於橫山師事寶林禪師昕夕禮斗道成就山巔構北斗殿明萬曆十二年知州陸長庚修其舊址得巨礎凡四乃真君遺蹟也萬曆志互詳祠廟

〔案〕真君或云烏程人或云句容人均難深考要其隱居衡山學道證仙事有確據不可誣也

徐僊不知何許人

〔南畿志明一統志俱作徐真人〕

州南十里有山擇而居

焉即今丹井山也就山鑿井煉丹丹成仙去至今遺井

尚存

〔萬曆志〕

唐

蒼仙不知何許人愛義蒼山之勝隱居焉不笑不語時見時隱莫測其端所居有雲棲巖洗藥澗玉女峯升仙臺煉丹崖遺跡宛然後人為立祠義蒼山中

〔萬曆志〕

元

王當陽元初遇異人能幻化之術後遊武當山歸於郡南平頂山建昇平道院修煉其中撰精語後端坐而化時年九十餘矣

〔明一統志〕

〔案〕南畿志明一統志所載仙釋止徐真人王當陽二人今據萬曆志首張真君又增蒼仙

明

許真君成化間至建平淨覺寺書一詩於几上字跡高半寸許其詩曰一派水流清繞徑數株松柏冷當門我來

經宿逢秋晚踏破西階碧蘚痕寺前有塘因真君浴其中遂名神仙塘楊志

孔師居正德間建平白鶴觀道士也嘗遇異人授以祕錄能呼吸風雨驅役鬼神禁蛟召鶴斬魅禳星年八十尸解仙去通志以上仙

漢

寶林禪師有神術常就橫山巔一石朝夕屈膝其上諷誦經典間出閒遊後不知所終今蟠龍亭即石壇故址萬志

唐

智通禪師居橫山石壇虔心求道日誦法華一遍年八十有六山神現羅漢形焉萬志

惠靜咸通中結菴竹山林巒鬱鬱惠靜初至手植荳蔬輒有麋兔擾之因告山靈曰畱老僧駐錫當絕此害自是麋兔屏跡其感應如此光化三年縣宰趙信為改名瑞峯永安禪院據李約記增詳寺觀

宋

契嵩多智慧能徹禪家宗旨崇寧中賜名曰明教嵩禪師



并賜寺額曰明教禪寺明太祖題橫山詩有曰上有禪

師悟透關通志萬志

元

亮公日本僧成宗大德七年入中土至州北之橫嶺嶺之

陽五峯森列愛其地勝遂結菴焚修焉名曰圓照年一

百八十二示寂作偈云日出扶桑是我家隨波逐浪到中

華眼前光景般般別惟有寒梅一樣化成化間州守陸

鳳為記據記及亮禪師語錄增

善會字無一長沙徐氏子出家湘山嘗參雪巖欽公於仰

山見樓前樹倒有悟至大間來主東山海智禪寺因更

建石溪禪寺平章昔利哈刺監郡哈那海皆執弟子禮

天歷己巳入吳泊舟一寺前呼僧語曰吾舟速矣汝舟

何遲衆莫測良久問今日何日答曰十一月十一日無

一卽沐浴更衣笑謂衆曰何天非吾夜旦何地非吾游

戲場耶吾其逝矣遂化時年六十八還葬寶珠峯下僕

文質為塔銘後有頑石瑱公上錫伽黎至元照又範銅

造佛云互詳寺觀

明

顯全號無礙建平人本姓鄭幼祝髮入開法寺天資穎悟  
 與其徒晝夜坐講堂演說人罕識之明正德丁丑年五  
 月十五日預示七月二十二日涅槃至期集眾誦經入  
 定而逝寺僧瘞其骨於殿北建塔焉楊志

行果建平人不知其姓名自言初為州庠生與五花巖紹  
 源禪師為方外交崇禎甲申後祝髮于宜興之龍池寺  
 為記室後歸五花巖終焉據行果撰五花巖蘭若記增

國朝

僧了悟順治初人幼未嘗讀書為石溪寺執爨誠篤不

欺四十歲後漸能識字通文理且工書今敲喝遺風獨

露堂二匾其手蹟也公舉 以上釋

宋

仙姑者宋時凌氏女父景文無子禱于亭山而生年十八  
 未嘗見其言笑會久旱禱雩無應姑忽曰亭山我所生  
 也盍隨我往祈焉即盥浴易衣步行赤日中宗族異而  
 從之登山拜祝畢烈風晦冥暴雨如注眾驚走失姑所  
 在明晨視之則坐化山巔矣村人立祠祀之姑性好衣  
 白因號白衣三娘至今禱雨有應據凌氏譜增

白佛姓梅琳塘陳氏甥女姊妹三人佛第三幼慕宗旨共誓不嫁宋紹興五年俱坐化大楊樹下鄉人伐木置水中逆流而上因刻木祀之香火不絕

楊志

廣德州志卷三十七

列女志

完節

義烈

貞孝

賢媛

范蔚宗曰高士宏清淳之風貞女亮明白之節徽美未殊而世典咸漏故綜其成事爲列女篇維時表閭則有桓嫠龐母圖形則有禮宗立碑則有曹娥叔先雄懿哉端操有蹤並昭彤管矣夫孤岑勁栢無意求知幽谷貞蕤有心共賞恭遇

聖朝褒嘉節孝建坊立祠與忠義等且令載入志書以垂不朽所以闡微隱而維風教者實曠古所未有桐本大



邦沐浴

雅化以節烈貞孝上者歲計十數人膺

旌表者居半其中或誓堅之死或義不苟生或處室完貞  
徹環盡孝爰自元明以來區明風烈約舉闡儀復為旁  
搜賢淑分著於後用備女德焉

完節

晉

杜義妻裴氏

通志

年二十夫亡家貧

萬曆志云織紉為業

事姑愈謹終

身不嫁有司以事聞武帝旌表其門

南畿志

按晉書列女傳無其人惟后妃外戚二傳載成恭皇

后父杜乂京兆人鎮南將軍預之孫襲封當陽侯為

丹陽丞早卒無男生后而乂終妻裴氏嫠居養后以

禮自防甚有德音咸康初追贈乂金紫光祿大夫封

裴氏高安鄉君孝武帝寧康二年進封廣德縣君裴

氏名穆長水校尉綽孫太傅主簿遐女太尉王夷甫

外孫遐隨東海王越遇害無子惟穆渡江遂享榮慶

立第南掖門外世謂杜姥宅此則杜乂妻裴氏之明

文也乂籍京兆裴籍河東

見世說新語注

南渡後遷

徙無常裴由高安進封廣德或當時僑居廣德未可知也但兩家俱無子杜姥宅又在建康不為廣德人舊志因裴有廣德之封遂指為縣人改父為義改孝武為武帝傳會已甚因沿襲日久不欲輒為刪改仍之而附考正於此

明

陳善慶妻蔡氏年二十一夫亡守節事姑終身不改洪武

十三年旌

南畿志明一統志

潘奕三妻應氏建平人早寡姑諭之曰窘且無子何恃而

守耶應泣曰曾謂有兒而守無兒而嫁乎富而守貧而

嫁乎志操如一詔旌其閭

通志。案氏未詳旌年據楊志載在永樂所旌之前故列

此

曹

通志楊門志均作葛今從南畿志萬歷志

丑兒妻呂氏年二十一

案楊志脫一字通志

因之誤

夫亡姑憐其少欲嫁之呂以死自誓至老不易永

樂二十一年旌

南畿志明一統志

曹丑妻田氏舊立坊在州治東今廢

萬歷志

案舊志列女傳俱不載田氏萬歷志于坊牌類有云

節婦坊在州治東為曹丑妻田氏立今廢楊門諸志

並同再查今節孝祠有牌上書明詔旌節孝曹丑妻田氏則志之遺漏明矣詳舊志失載之故或因前有曹丑兒妻疑為重出不知曹丑兒與曹丑一係單名一係二名呂與田又判然兩姓安得一載一刪考田氏坊萬歷修志時已廢則其旌當與曹呂氏先後而祠牌立於雍正五年有司春秋致祭李志修於乾隆初而竟不一檢閱相沿脫漏殊可異也今急補之

俞國良妻田氏年二十四夫亡終身守節事聞旌表

南畿志明

一統志

宏治十六年知州范昌齡為立坊表之

萬歷志。案原作范

昌齡以各門廢墜立坊表之楊李等志改為俞門俱不可解今刪之後做此者不復注

**案**南畿志載本州列女止裴蔡呂田四氏明一統志

列女止載蔡呂田三氏通志惟呂有事實裴蔡田止

載旌年後凡有名無事者俱注氏下

雲騰妻陳氏嘉靖十三年建坊旌表

李志。案萬歷志不載旌年故專錄李後

做此者不復注

裴恩一妻張氏建平人

通志

年十八夫亡其貧自守至七十

三歲嘉靖四十五年旌

楊志

夏商八妻戴氏建平人

通志作廣德人

二十歲夫亡家貧無子苦

節以終隆慶三年旌楊志

生員王應貞妻沈氏建平人通志宣城御史寵之女溫恭儉

素足不踰閭夫病疽氏吮之不痊卒氏年二十四無子

家貧或勸之嫁引刀自誓父與弟懋學俱宦達氏絕意

歸寧紡績奉姑姑病供藥食惟謹萬曆二十三年建坊

旌表日久坊圯乾隆十七年呈請奉主入祠李志建平存藁

梁允乾妻呂氏建平人通志作廣德人年十八歸允乾甫一載夫

病氏籲天刲股不救撫遺腹子獨居壺內卽至戚亦不

得見萬曆二十三年旌李志

張近妻劉氏通志年二十一夫亡子幼姑老臥伴夫柩躬勤

紡績養親撫孤按院劉日梧題請旌獎畧云劉氏性堅

從一志矢靡他送往事居全孝立節芳名懿行皎日秋

霜萬曆二十八年建坊於北門楊志。案萬曆志有名無傳楊志始載題請之

文而誤爲勅今正之

生員李熙美妻夏氏通志禮部司務夏思女十九夫亡守節

五十餘年崇禎中建坊旌表楊志

濮陽景彥妻許氏通志十九于歸四載夫亡一子甫二齡氏

上事姑嫜下撫遺孤扶持鞠育不辭癯瘁巡撫張劉具

題旌表壽八十三

楊門志

陳槐妻劉氏

通志

年二十一夫逝姑老家貧一子方在襁褓

氏誓死靡他紡紝事親竭忱孝養撫子成立九十三卒

知州何鳳起詳請旌表

楊志

以上自晉迄明奉朝旌者十四人

本州九人  
建平五人

趙輔仁妻曹氏年十九夫亡一子甫懷抱母家勸其再嫁

氏剪髮毀形苦志守節始終不變萬曆壬午巡按蔡獎

之

李志

濮陽桴妻潘氏

通志作  
建平人

潘鎮女年十八適桴夫病瘵割股

以療一年桴卒人或以無子為言氏以死謝孝事翁姑

慈撫繼子居常扃門侍一嫗婦終日相對寂如也鄉族

白於州州申撫按獎表其閭

萬曆志

生員蔡兆元妻管氏

通志

名玉妹生員世康女年二十四兆

元沒守節三十年卒按院劉加獎異焉

萬曆志

生員吳渭妻濮陽氏事姑盡孝夫病瘵五割股卒不救時

年二十四繪夫像朝夕饋奠有奪其志者氏引七針刺

面血流仆地當道聞其事歲給米帛周之

李志

生員姚一偉妻王氏建平人

楊志

夫早世生子召南甫二月



嚙指自誓不更醮延師教子成立儒學蕭匾曰昭我彤

管門志

韋大和妻岑氏建平人通志年十六適大和歲餘夫卒子士

元方產百日氏勵志甘守誓死無他姑壽至九旬奉養

盡道課子入泮當道獎之楊志

史大臨妻嚴氏建平人通志年二十一夫卒撫兩孤苦

節以終郡邑獎表其閭楊志

宗光業妻咎氏建平人通志光業亡守節不變年八十餘課

兒及孫縣令獎之門志

生員任之傑妻岑氏建平人楊志夫卒以死自誓姑疾割股

和藥以進天啟丙寅縣令謝獎曰節邁栢舟子九鼎庠

生門志

史光祖妻呂氏建平人通志光祖卒毀膏沐屏色笑置

柩臥室每食獻如生禮舅臥病積年備極孝養通志崇禎

庚辰督學金蘭獎之楊志

生員宗有道妻呂氏建平人楊志有道三十二卒氏奉翁姑

撫二子曲盡心力家素裕而衣食悉取粗糲躬紡織自

課其子治家內外肅然六十年如一日事其母亦盡孝

四時伏臘修禮如子母死哭幾殞縣令獎之

李志

王結四妻宗氏建平人

楊志

翁早世姑方氏以苦節著遺腹

生結四家徒壁立瓶無餘粟方茹苦撫孤數年而歿及

結四長娶妻宗三載甫育子結四又亡宗年方十九有

憐其少勸之再嫁者宗泣曰我姑懷孕守志矧我既抱

子能不志姑之志乎以死自誓勤績緝以給衣食歷四

十餘年貞操如一姑媳完節邑宰給匾其門

李志

宗賓臣妻周氏建平人

楊志

生子方數歲賓臣故氏年二十

六誓不以存亡易心家蹇落有勸之嫁者泣曰吾自結

縊之日已決為宗氏鬼矣將安之績緝食貧白首如一

知州事閔公表其廬

李志

宗明標妻凌氏建平人

楊志

年二十三明標故一子方乳哺

家貧無依矢志靡他閉戶紡績以撫孤兒縣尹獎之

李志

宗騰南妻邵氏建平人

楊志

夫卒氏年十六父母欲奪其志

氏哀毀自誓謂未亡人得廟食於宗氏足矣撫姪為嗣

足不踰閭鄰有讌會皆謝絕不與終身縞素不御絺繡

縣尹獎表其閭

李志

王鏊妻岑氏國儒妻呂氏姑媳也建平人皆苦節終身縣

令獎以雙節

李志

以上前明奉當道獎者十七人

本州五人建平十二人

生員濮陽信妻夏氏

通志

年二十三夫亡遺孤甫一月家貧

姑老以節終

萬厯志

王壽齡妻毛氏

巫必禎妻濮陽氏

張萬善妻陳氏

葛珠妻胡氏

以上四人萬厯楊門諸志皆失載事實

濮陽科妻李氏茹荼砥節苦行著聞

李志

駱世諫妻錢氏年二十五夫故守節五十四年

李志

駱世選妻宗氏年二十八夫故守節四十七年

李志

駱世武妻鄭氏年二十九夫故守節三十六年

李志

濮陽紹炳妻湯氏年二十七夫亡勵志守節父母欲奪之

氏持斧斷闕曰吾誓死濮陽氏家決不出此門始終不

變年七十八卒

李志

耿昌昂妻董氏年十八夫亡哀慟立繼承祧事舅姑生養

死葬盡禮設夫位於中堂飲食必進四十餘年如一日

年六十三卒

李志

生員李道隆妻吳氏年三十夫亡家貧矢志事姑撫幼操

作成家年九十卒李志

蔣邦伏妻鮑氏李志

巫怯妻盧氏年二十一夫病亟與氏訣曰守節固好但家

貧無子勢必不能我死可即嫁泣曰家貧可治紡績無

子可以依姪但知一夫一婦決無嫁理夫死撫姪為嗣

終身守節李志

宋欽行妻王氏年十八夫亡栢舟矢志義方訓子守節七

十四年壽九十三卒李志 以上本州人

王心妻潘氏建平人通志作廣德人夫丁年即世矢志不更遺腹

生子一龍姑宗氏臥病兩朞侍養不怠及卒喪葬盡禮

楊志

史華一妻徐氏志悅妻李氏華一病篤徐年十九割臂救

夫祈神請代既寡誓不再適撫子成立年五十六卒志

悅其孫也早世無嗣李父母欲其女嫁剪髮自誓終身

完節楊志

方志美妻姚氏弟志揚妻王氏志揚死遺一子王年二十

一誓不再嫁越二年志美復死無子姚因泣謂王曰方

門兄弟惟此一孤吾與若死生共倚之忍爾獨守乎同  
紡織以課其子楊志

姚冕七妻陳氏婢某氏通志陳十九而孀子在抱撫之成立  
婢亦感而不嫁年八十終門志

**案**是婢之不嫁較勝北宮之女但其守貞為陳終亦  
為姚也縣志門李志但云其婢失其本志矣通志大  
書之極是今從之

王鑿妻丁氏通志鑿業儒早卒氏年少家貧其父母迫令改  
醮嚙臂自誓遺腹生子國義萬厯歲饑食榆皮糠粇撫

孤成立年八旬卒楊志

姚奎宗妻王氏應庚妻貢氏王少失所天荼苦自勵教子  
成立應庚其第三子也早卒無嗣貢即撫其姪節操一

如其姑云楊志

石可貽妻王氏通志可貽亡兩孤皆幼暑鋤冰織指血淋漓

艱苦教子娶媳延祧以壽終楊志

生員李茂繼妻吳氏夫卒年二十八勵志守節茂夙以孝

行著氏以節終人並稱之李志

溧陽婦者不知其姓氏萬厯庚辰江南大饑次春疫作婦

襁其子與夫轉徙丐食棲止張公廟夫疾值經旬雨雪無所乞食夫死婦抱兒日夜號泣居人憐之呼與俱去婦不顧哭益哀或遺以餽粥謝曰天之不存生復何為拒食翌日過之則婦伏夫尸死兒含乳死母腹下人咸義之合葬於廟側

李志

監生史志尹妻宗氏志尹早卒守節六十餘年

李志五見賢媛

郝希彩妻周氏希彩生而背父母施鞠之弱冠而卒周年二十二子方五歲姑媳孀居撫孤成立艱苦備嘗姑卒祭葬成禮有勢家慕其賢強委禽焉氏剪髮自誓乃已

李志

胡梁妻任氏性幽貞不喜華服事翁姑惟謹相夫子惟勤年二十三夫故子方弱齡茹苦守節年七十卒

李志

蔣宗氏生員仲佳之母年二十七夫亡仲佳甫三歲母家強之歸欲奪其志氏知之誓不歸寧撫教其孤有聲庠

序李志

方邦贊妻夏氏

楊志

在室時父奕有疾割股和藥以進得瘳適方生四子室如懸磬晝夜紡織課子讀書邦贊病亦

剗股療之孀居三十年稱完節焉

李志

方志道妻郭氏楊志年二十六志道故無立錐之地又無兄

弟可依遺五子長者僅十齡耳族人勸之嫁郭泣曰生

子而使失所是負夫也遂剪髮自誓蓬頭垢面紡績易

粟以哺兒五子既長家聲丕振八旬而卒李志

岑允昌妻宗氏嫁甫及期而允昌卒時子玉一方妊氏守

節不渝撫孤成家壽六十七李志

盛心七妻袁氏楊志茹苦操家克諧內則心七早卒三子皆

幼氏辛勤提挈歲荒機織自給撫三子皆成立李志

俞顯宸妻呂氏

夏繼韜妻戴氏

岑國楚妻王氏以上三人楊李志俱未載事實

王應駿妻史氏通志年二十六應駿卒遺腹產子之泮撫之

成立備極荼苦壽八十八李志

徐仕孝妻傅氏年二十七仕孝卒遺孤三氏茹荼飲冰撫

之成立七十五卒李志以上建平人

右前明未奉旌獎并無年分者四十一人本州十四人建平二十七人

附

案婦人守節而未奉旌者舊志所載概不紀年今據

各姓家譜增補前明之人更無從挨年編次故附列於後

丁伯霖妻王氏子甫孩提而伯霖歿歿勤績絀躬井日撫教幼孤成立其子德以孝行聞厥後有丁鏗妻趙氏丁孟僑妻葉氏丁太妻沈氏丁繼泰妻胡氏丁復名妻范氏皆以節著均正統以後人

丁氏譜下同

葛相妻張氏年二十九夫故有子甫十月姑性嚴姒復譖之常被捶撻伯祖姑調護之氏絕無怨尤後姑亦感悟冬夏不廢機杼卒能全孤存祀年七十四卒與王氏皆

正德間人

葛珽妻王氏年十九夫故無子矢志堅守七十年如一日葛遇春妻許氏年二十四夫故家貧二子俱幼紡績撫育婚娶生孫以苦節終嘉靖間人

張珂繼妻沈氏婢阿女年二十四珂沒舅姑早世伯瓚遠宦閩中遺孤俱幼氏隻身持門戶只婢阿女相隨紡紕練裳椎髻撫教其子長大禮縣丞次大樂庠生入監家產本薄後拓至三百餘畝其子欲上其事於州氏叱曰此我分也豈以是求榮哉年六十六卒婢感氏意亦終



身不嫁嘉靖間人

張氏譜

章鎧妻盧氏年十八夫故一子在襁褓而身更有娠家業

因夫病費盡氏晝春夜織撫立二孤與蔡氏二妾皆嘉

靖間人

章氏譜

叅將蔡汝蘭妾項氏張氏汝蘭故項年二十六張年二十

七張有子凱元甫八歲項無子共撫之躬親織紝凱元

既長克繼父業

蔡氏譜

韋顯韜之母宋氏年二十而寡有遺腹或勸以改嫁以死

自誓已而生顯韜冰操愈勵人咸敬之厥後有韋銓妻

王氏韋尙威妻管氏韋魯直妻陳氏韋瑞元妻濮陽氏

亦以亮節著俱正嘉以後人

韋氏譜

陳夕妻王氏名膺子嘉愛繼妻胡氏王年二十夕亡勺水

不入口數日時嘉愛尙在襁褓舅姑以撫孤勉之乃強

進食守節數十年當事匾表之嘉愛之死也胡亦年少

子幼孀姑又病篤胡割股以療姑尋卒夫弟逼令他適

密約娶家多其僕從強之登輿有掣其手者氏給曰我

檢拾衣履從汝行何用逞威乃釋其手氏卽覓刀自割

去臂肉擲地哭曰惡奴敢污吾手血浹襟袖衆驚走夫

弟畏禍鳴於官獎曰節操冰霜又陳昇妻楊氏名應淑年二十七喪夫一女未晬撫姪為嗣俱嘉隆間人

陳氏譜

周曰庠妻許氏生員凝楚女年二十四而嫠端莊嚴厲族黨敬畏之守節五十七年子輅早歿無後周日達妻楊

氏年十九達亡勤儉持家守節五十餘年俱萬曆間人

周氏譜

王福妻邱氏年二十夫故撫孤成立教以力行善事萬曆間州守段以栢舟永誓獎之年八旬餘卒給事李天植為傳方洪武間其先世名巨海者年十八而亡妻徐氏

遺腹生子教育之勵節終身福即其裔也

王氏譜

葛嘉春妻韋氏年二十八夫故無子氏服粗茹苦舅姑性

嚴事之惟謹萬曆間人

葛氏譜

周湘妻駱氏年近三十無子夫病刲股以進及歿有欲奪

其志者氏以死自誓姑老病紡織以養萬曆間人

駱氏譜

管夢雲妻韋氏年十九夢雲故家貧二子俱幼衆謀奪其

志氏誓死堅守撫孤成立萬曆間人先是有管煜妻梅

氏亦十九歲寡撫育二孤有成又管雄妻朱氏管岳妻

陳氏管珣妻鄭氏管元幅妻鄭氏管元光妻蔣氏管進

妻邱氏更有管女嫁為許四妻者皆青年矢志白首完

貞故連及焉管氏譜

楊伯妻陳氏年十九夫故堅守萬厯間州守何以霜筠媿

潔獎之卒年八十六後啟楨間有楊相四妻王氏楊一

經妻阮氏皆以完節著楊氏譜

王允昇妻周氏年二十夫故二孤俱幼矢志堅守教子成

立崇禎時人王氏譜

以上新增俱本州人

